

Pita saro peba titi owera ie kimibiria urubia aboto

¹ Mo masiro Saimoni Pita ie, nedi peba titi owera ro mo ro nisioidiro. Iesu Keriso edi woko ro mo ro wisa tato se nemesioidirotiti, ibose mo nou ro kotiodorai dubu e.

Iesu Keriso nimo ro Godi to nasorotiti-dumo, ibose nou nimo kiapopo dubu nouse ie. Nimo nou ro modobo ta-niwaititi nou owera kimibiria aboto, mabu nou mea tuputupu dubu e. Nio etio ra owera Iesu Keriso sapuwo to mea se na-gimibiria-rimo, neibi kitiodorai urubia beda sosoro nimibiria-birimo, nedi peba titi ro mo ro nio ia aboto nisioidiro.

² Wisa tato kiwarebai, miro mutu nio niro turi ato aise ba-miroromowadotiti-do, obo sosoro ba-mararasedutiti-mo. Idaibo sosoro ba-mororosioioidiro-mo, mabu Godi nio ro morobise to umoro ta-goi-rimo, ibose nimo kiapopo dubu Iesu nio umoro ie.

*Godi urubia to ta-gararapoi-rimo idaibo sosoro to
ba-dirowomidiro*

³ Godi edi pupuwo korosa ro nimo ro kebase edi na nomidai-rimo nou aboudo, nimo nou ro imese modobomodobo ta-niwaititi-ro keremiro mea se kiwabo sapuwo to, ibose Godi ubi tanaro kisioidiro aboto. Nedi tanaro ro nou ro gisioidiro nimo aboto, mabu nimo ro Godi morobise umoro ta-noi-rimo. Godi imese meana ia ie, ibose nou masiro auna ia ie, nimo nou mabu ato nirapoi-ro nou urubia to ararasoro ri.

⁴ Idaibo mino to Godi ro hodo gasaubiai-ro nimo aboudo, awawo meamea ia tanaro kisioidiro aboto. Ubauba ubi tanaro erere se edi na ro iamotiti, imese sirio urubia nedi duriomoro ro nato na-irowomidiro, neio ro sirio tau aise isioidirotiti-dumo. Nedi ubauba ubi tanaro sirio ro sopu duriomoro urubia ubauba neio ro iwaititi-dumo. Kaupoti Godi ubi ie nimo ro nou edi kimasaubiai owera ro neito nedi ubauba ubi tanaro sirio ro neio aboudo karagareawado, ina Godi sosoro nato korowomidiro.

⁵ Godi ro nimo sapuwo to iedi awawo tanaro ro ta-gisioidiro. Ina nou mabu ato ie nio edi kimibiria ro na-iworohuti-dumo Iesu sapuwo to, ina meamea tanaro kisioidiro ba-dadabuai-mo. Ina Godi edi morobise umoro ro ba-dadabuai-mo.

⁶ Ina ubauba tanaro kisioidiro aboudo korodiobuti tanaro ba-dadabuai-mo. Ina koko tau ato kirimowotoi ba-dadabuai-mo. Ina Godi ubi gabo kobodoro ba-dadabuai-mo.

⁷ Ina borubi kimibiria urubia mutu naminiramio sosoro korowarebai ba-dadabuai-mo. Ina maumo nirimagare imese urubia sapuwo to ba-dadabuai-mo.

⁸ Mabu nedi meamea tanaro ro nio ro sirio tau namadimi-isioidiro-ri, ina nio abato namadimi-iroromowado-ri, nio Abera Naramu Iesu Keriso umoro koi sapuwo to meamea tanaro iopu sosoro nio aboudo amadimi-isuwoduti-ri.

⁹ Kaupoti beda urubia ra idaibo tanaro isioidiro tato, neio idaibo urio idomari mea se kirarowo pua, aupi namabu se kiauri ie, muso namabu neio ro timotimo se kiauri ie. Neio ro

woki ta-gimati-dumo ibo neio edi ubauba tanaro sirio ro na-isioidiro-mo, Godi ro keba ia se gimatopeamuti.

¹⁰ Mo medamio niramio, nio Godi ro girapoi-ro nou urubia to ararasoro ri. Ina noudo ie nio pupuwo kiasibowado modobo ie paease kiwawuti aboto ibo nio Godi urubia ie. Mabu nio ro nedi meamea tanaro ro aise namadimi-isioidiro-ri, nio sipi amadimi-iwodouti-ri, Godi edi gabo ro nio ro kemeserai gabo tato ie.

¹¹ Ina ido nimo Abera Naramu Iesu Keriso nimo kiapopo dubu, nimo boito nama-iwaboi-ri womu tato womu tato, nio odoro ri nou ro auna kamade mutu amadi-irumai-ri.

Nedi totomu owera ro nou se ba-dirobidiro-mo

¹² Mo umoro ie nedi totomu owera sirio ro nio ro kebase umoro ta-goi-rimo. Nio ro nedi morobise owera ro mea se ta-garatamudiro-rimo, koko se nou ri irobidiro-dumo. Kaupoti nio mo ro sirio tau umoro inaina anama-iwaititi-ri nedi totomu owera sirio ro neio sapuwo to.

¹³ Mo orodiobuti-ri pua mo idaibo tau ato na-nomidiro nedi sopu durupi ro nouto, mea tanaro ie nio umoro inaina aise kiwaititi nedi totomu owera sirio ro neio sapuwo to.

¹⁴ Mabu mo umoro ta-noi ibo mo ro nedi sopu durupi ro aupise ie anamadi-emeserai-ri. Nimo Abera Naramu Iesu Keriso mo nou ro paease ta-nemowawea-ro ibo nedi tanaro ro aupise amadi-ororosioidiro-ri mo aboto.

¹⁵ Mo ubi ie nio mo ro binio to umoro inaina kiwaititi nedi kitamudiro owera sirio ro neio

sapuwo to. Ina mo ro nio karaburai to namadi-imeserai-ri, nedi oweri sirio ro nio ro woki imati-ri pua, neio sapuwo to aise amadimi-imaragoidiro-titi-ri.

¹⁶ Nio neibi ro ta-nimowautiti-bimo ibo nimo Abera Naramu Iesu Keriso nou amadi-orowameai-ri simara pupuwo korosa mutu. Karasauti totomu arua urubia ro simara bagea kimaragoidiro to na-gisoidiro-rimo, neibi ro nio neito imowautiti pua. E e, nou sosoro neibi ro simara idomari to na-nowea-birimo, nou imese auna ia dubu e.

¹⁷ Mabu iedi tau ro nato, Iesu Abera Godi ro auna masiro nato gomia. Imese auna ia woroworo Godi, oweri kodu nou aboudo ibo gosuruo-ro, 'Nou mo ia mere ie, mo ubi mere ie. Mo auna kamade ie nou aboto.'

¹⁸ Godi aboudo edi oweri kodu ro na-gosuruwo-ro, neibi ia ro simara gare to ta-nemewidiro-birimo. Mabu neibi Iesu mutu edi tarena podo ro neito atu se nioro-birimo.

Godi ipusu oweri urubia ro oweri na-garo morobise oweri ie

¹⁹ Godi edi ipusu oweri urubia ro keba ia se Tarena Buka ato beda oweri gisoidiro-rimo, io morobise oweri nou se ie. Ina nedi oweri ro nimo kimibiria urubia auna umoro ie ibo nou morobise ie. Neio ro beda oweri gisoidiro-rimo nou se kibodoro modobo ie. Nedi oweri ro nou pina sosoro ie duwoduwo nou ro ama-owagare-ri. Nou kibodoro modobo ie womu tato Iesu Keriso neito namadi-orowameai-ri. Idiai kiboni kebase beda sosoro ra namadi-imewiti-ri, ina kowaroho saiki saro rido nama-owaroho-ri, Iesu edi woroworo

ro idaibo mino to nio edi niro turi ro nato
ama-imewititi-ri.

²⁰ Nio umoro sapuwo to auna ia oweru nou e.
Nio abato umoro aise kowamo modobo ie, ibo
Godi ipusu oweru urubia ro beda oweru
gisioiido-romo Tarena Buka ato, nedi oweru ro
ata dubu ata ro simara mino to nama-imabuti-ri,
nu nakara se ama-arasaubuti-ri.

²¹ Mabu Godi edi ipusu oweru ro Tarena Buka
ato na-iamo, ibo pua ipusu oweru urubia ro
simara ubi ato kisioidiro. Neio Tarena Urio ro
gimasouti, ina oweru Godi aboudo ie neio ro
urubia nato gimowauti-romo.

2

Umoro oweru karasaubuti kitamudio urubia sapuwo to ie

¹ Godi ipusu oweru urubia keba ia tau ato
Isiraere urubia abato ta-gorowomidiro. Ibose
neio abato Godi ipusu oweru karatigi urubia iato
ta-gorowomidiro. Neio ro morobise oweru
imowautiti pua, karasaubuti oweru
imowautiti-mo. Ina nedi atu sosoro tanaro ro
nio abato karasaubuti kitamudio urubia ro
amadimi-isioidiro-ri. Neio ro bagea kitamudio
nio aboto piro se amadimi-iwodoro-ri. Neio edi
karasaubuti kitamudio oweru ro urubia edi
mea kimibiria ro amadimi-iporeawado-ri. Nedi
urubia ro auna ia Abera Naramu ro neio sapuwo
to auna wisa ta-gaiwai neio iapopo ri. Kaupoti
nou neio ro ibo amadima-aratiouti-ri, 'Mo umoro
pua iedi dubu ro.' Nedi urubia ro neio ro urubia
tuturu tau to isaubuti-ri pua, iedi tanaro ro neio

ro aise namadimi-isioidiro-ri, ina iedi mabu ro nou ato, neio Godi ro saiki ata ama-imadibiai-ri.

² Neio ro edi siripo tanaro ro namadimi-isioidiro-ri, ina sirio kimibiria tato urubia ro amadimi-iauri-ri, ina nou mabu ato ie Godi edi morobise gabo ro urubia sosoro gabo ato masiro ubauba amadimo-owaititi-ri.

³ Nedi karasaubuti urubia ro neio ro urubia edi na to namadimi-itamudiro-ri, nedi oweru ro neio ro nakara se gisioidiro-rimo, nio edi mani ro namabu mutu karasaubuti mino to imade rie. Nedi urubia ro ubauba wisa Godi ro ama-imio-ri, keba ia se ta-gimedeu. Neio ro edi ubauba wisa ro namadimi-imade-ri Godi ro timerebidiro-die sianu, simara tau emou-dumo. Auna ubauba tau tou-die saiki ata neio nou ro ama-iohiai-ri.

⁴ Ba-dimaragoidiro-mo, nio umoro neido doi-mo. Nio mo ro a-nimowapotai nedi urubia ro neio Godi ro saiki ata ubauba ama-iporeai-ri. Mabu Godi sowake urio sirio, ubauba tanaro etio ro gisioidiro-rimo neio wisa, gabo Godi ro imopai pua, imese ubauba ta-giwai, sisibo ia bobo goro to aise giherai. Taie magere aise gimopai. Neio ro womu tau koto ioudo emasebidirotiti-dioumo, simara ubauba wisa kimade aboto ie.

⁵ Keba urubia nedi duriomoro ro nato na-irowomidirotiti, neio Godi huru kemoworoho urubia ie. Abata obo Godi ro na-gemeiriai-ro, urubia sirio iwasiai pua, nou ro aise giopiauti. Neio Noa ro ta-imowautiti meamea tuputupu tanaro kisioidiro sapuwo to. Ina Godi ro Noa kawakawa gowarebai, keremiro nou gomia 7 urubia mutu.

⁶ Godi ro ibose Sodom ra Gomora ra sabowa

teibo ubauba wisa na-gimia-ma neio ubauba tanaro kisioi diro sapuwo to, era to aise gimusubua-ma, ata nakomu ata ararasoro pua, imese aise giporeai-ma. Idaibo awawo tanaro Godi ro na-gisioi diro, urubia nato eremasibai rie, ibo ido Godi huru kemoworoho urubia neio nou ro idaibo mino to ama-iworohuti-ri.

⁷ Kaupoti Aberaham aramu Roti, nedi ubauba ro nou aboudo Godi ro nou ia se gowadau Sodom sabowa rido. Mabu Roti mea tuputupu dubu e, nou ro iedi sabi kisebo urubia ro na-iaurititi ubauba tanaro sirio na-isioidirotiti-mo, nou neio ro auna mibo omiotiti-mo.

⁸ Nedi ubauba tanaro sirio ro Roti ro simara idomari to na-iaurititi, ibose simara gare to ubauba oweru na-irowidirotiti, nou urio neio ro idaibo adotiti-mo. Mabu neio ro edi tanaro ro na-isioidirotiti-mo, imese siripo ia tanaro isioidirotiti-mo. Ina Godi ro Roti neio aboudo aise gowagare.

⁹ Godi aboudo tanaro koko pua nou ubi tanaro se kisioi diro urubia nou ro koko kiwaibirio tanaro aboudo kiwagarewado ie. Ibose nou aboudo koko pua ubauba tanaro urubia kirobidiro, iana koto saiki emasebidiro ri. Neio iato na-eremasebidiro-dumo, ubauba wisa kimade ta-gatamuai-dumo.

¹⁰ Mareamarea ubi tanaro etio ro isioidi diro-dumo, ina Godi edi ubi tanaro ro na-iseiotiti-dumo, nedi oweru ro Godi ro wisa kimio sapuwo to, nou morobise ia oweru ie nedi urubia ro neio sapuwo to. Neio ro Godi aboudo auna ia ubauba wisa amadimi-imade-ri.

Nedi karasaubuti kitamudiro urubia ro neio

auna keremowabu urubia ie, neio simara sapuwo to se keremaragoidiro ie. Neio ro awawo urio awawo masiro mutu tere kimati pua, neio ro ubauba owera karo kawa aise karo ie, ubauba neito aise iwaititi-dumo.

¹¹ Kaupoti Godi edi sowake urio sirio ro neio ata pupuwo korosa mutu irowomidiro, neio edi pupuwo korosa ro imese pupuwo ia ie. Nedi karasaubuti kitamudiro urubia ro neio mutu keremotobowa ato modobo pua. Ina Godi edi sowake urio ro neio ro nedi awawo urio ro kiasoro pua Godi sosoro gabo ato.

¹² Sirio tanaro sapuwo to neio imese umoro tato ie, kaupoti nedi tanaro sirio ro neio ro owera to ubauba iwaititi-dumo. Neio soka ra giro ra sosoro ie, durupi ubi tanaro kimaragoidiro tato se na-isioidiro, tito-dumo. Tumu giro simara mamio ro na-girotuti-rimo urubia ro ido kiopiauti aboto ie, nedi urubia ro neio idaibo sosoro ie.

¹³ Neio ro edi ubauba na-isioidiro-dumo arua urubia aboto, wisa neio aboto Godi ro ama-iwame-ri. Neio kiho kidio paease siripo tato se isioidiro, tito-dumo. Neio auna ubi ie idaibo tanaro kisioidiro. Nedi karasaubuti kitamudiro urubia ro neio nio mutu na-iradabutiti-dumo, marea obotama sosoro ie. Nio neio ro idaibo ubauba iwaititi-dumo ibose siripo iwaititi-dumo. Neio auna ia ubi ro iamotiti durupi ubauba ubi tanaro isioidiro ri, idaibo soriomu kisioidiro, kidio, upo tanaro kisioidiro.

¹⁴ Nedi urubia ro arua urubia upi neio ro idomari to se kimaipirio ie, idomari neio aboudo kiaubo pua. Neio ro ubauba tanaro kisioidiro aboudo korodiobuti pua, imese sirio tau noti

isioidirotiti-dumo. Nedi karasaubuti urubia ro pupuwo tato kimibiria urubia poinai neio ro imaremo-dumo poinai ro irobo rie. Neio niro turi auna se gitamudiro-rimo namabu sogoi ro kiwati aboto. Nedi urubia ro Godi ro gabo kebase tau se ta-gimesioidiro, saiki ata nou aboudo ubauba amadimi-iwia-ri.

¹⁵ Neio ro tuputupu gabo tau se ta-gemeserai-rimo, Baramu Beio nu edi gabo gosowa nou emamaro-dumo. Isarena na-imaiwo Baramu ro aise gimade, Isiraere urubia imini owerato ubauba iwai ri. Mabu nou mani sogoi ro owatiti.

¹⁶ Kaupoti Godi ubi ato Baramu doniki ro gotuputai ibo, 'Oro idaibo ubauba tanaro isioidiro.' Doniki owerakaro pua abora se garo, urubia dubu sosoro garo. Taie iedi oweraro Godi ipusu oweradubu Baramu nou ro na-girorowai, edi kawakawa tanaro ro kisioidiro aboudo doniki ro aise godiobo.

¹⁷ Nedi karasaubuti kitamudiro urubia ro obo sosu sosoro ie, ina nedi obo sosu ro nato obo omidiro pua, imese ororo ia ie. Ina ibose neio wiawia sosoro ie auna saiki tau ato, gawia egea se na-ihuduti-die daroho nato aise ou-ri pua. Ina duwoduwo ibi gugu imese sisibo ia ie neio imasogoro-die.

¹⁸ Mabu nedi urubia ro neio owerakaro ato auna keremowabu e, ibose neio oweraparaparara karo kawa karo ie. Karasaubuti kitamudiro urubia ro arua urubia sairo rido na-imududirotiti-dumo, urubia aise iraidodorowadotiti-dumo. Taie neio edi ubi tanaro ro neio ro aise isioidirotiti-dumo. Neio ro

auna se orio kimibiria urubia poinai imamo-dumo, ina neio ubi tanaro aise isioidirotiti-dumo. Orio kimibiria urubia ro kakate gabo dese to na-gimesere-rimo, idaibo mino to iageawado-dumo durupi ubauba ubi tanaro kisioidiro aboto orowame ri.

¹⁹ Nedi karasaubuti kitamudiro urubia ro ibo iaro-dumo, 'Nio durupi ubi tanaro aise gidimi-isioidiro-ri, ata sabi tato ie.' Kaupoti nedi karasaubuti urubia ro neio ia imese ubauba tanaro sowake urubia ie, ubauba tanaro sowake neio ro irohotiti-dumo. Mabu urubia dubu ubauba ro na-oworohuti, iedi ubauba ro nou ubi tanaro urubia dubu ro aise kosioidiro ie.

²⁰ Ina Iesu Keriso nimo atu Abera Naramu, edi na ro niapopo-ro ubauba aboudo, nou umoro etio ro goititi-rimo, duriomoro urubia iedi marea tanaro aboudo ta-garagare-rimo. Kaupoti urubia edi mareamarea tanaro sirio ro nou aboto beda tau ato korowameai ra, ina iedi mareamarea tanaro ro poinai sosoro ie neio ro namadimi-iwakopeamuti-ri, ina namadimi-iwororuwo-ri, nirimagare iedi urubia ro keba ia se modobo ato irowomidirotiti pua, ina abora imese ubauba ia se orowomidiro. Ibo pua keba ia se beda mino to gorowomidiro.

²¹ Mabu nedi urubia ro neio ro Godi edi tuputupu gabo ro umoro koi tato rasiri ie, io modobo ie. Mabu etio ra nedi gabo ro umoro koi tato, neio ubauba wisa kainai ie Godi aboudo namadimi-iwia-ri. Kaupoti etio ra nedi gabo ro umoro na-goi-rimo, ina ido Godi edi tarena oweri ro huru na-gemowou-rimo, auna ia ubauba wisa Godi aboudo nou amadimi-iwia-ri.

²² Totomu oweri Tarena Buka ato idaibo

urubia morobise to giwauti, *Soka bekoko na-iromoruti, nu ina simara bekoko aise kimowameai ie.*

Ina ata muro owera idaibo urubia neio sapuwo to ibo ie, *Giro batina obo to kowiouti ato, nou sigibere ato ina aise korowawodorowado ie.*

3

Morobise ie Abera Naramu amadi-owameai-ri

¹ Namuturubi nirimagare babio, mo ro kebase peba titi nio aboto ta-nisioidiro, ina abora ata peba titi nisioidiro nio aboto. Nedi peba titi teibo ro nio aboto nou ri nisioidiro-ma, mo ubi ie nio mo ro umoro ina iwai ri ibo, nio ro kebase beda owera gimibiria-rimo, nou sapuwo to se mea kimaragoidiro ba-diworohuti-mo.

² Ibose mo ubi ie nio kimaragoidiro Godi tarena ipusu owera urubia ro beda owera garo-rimo, nio ro nou se ba-dimaragoidiro-mo. Ibose nio ro kimaragoidiro modobo ie nio aboto Iesu ro iedi urubia ro na-gitiodorai, neio ro beda owera garo-rimo. Nimo Abera Naramu Iesu nou nimo kiapopo dubu e, nou ro neio aboto nedi kitamudiro owera ro ta-gaiwai-ro nimo beda mino to korowomidiro ra.

³ Ina auna ia tanaro nou e nio umoro kiwai sapuwo to, womu tau ato keremasosowado urubia nio aboto paea se amadimo-owapotaiddiro-ri. Neio ro simara ia ubauba ubi tanaro aise amadimi-isioidiro-ri. Nio neio ro amadimi-imasosowado-ri gaga amadimi-imororouti-ri.

⁴ Neio ro urubia ibo amadimi-imowauti-ri, 'Iesu korowameai owera na-garo abora boira,

a-gorowameai-die ra? Etou owati nu? Nimo nasa naminami ta-gorowaburo-rimo, kaupoti nu nato orowameai pua. Kibase beda sosoro owamotiti, abora ibose to ama-owamo-ri. Godi ro duriomoro edi tau ato gosioihiro womu tato abora, ata tanaro ata ororosioihiro pua.'

⁵⁻⁶ Keba ia tau ato tobororo simara sogosogo mutu Godi ro owera to gosioihiro. Nou ro duriomoro obo to gosioihiro, ina obo maumo rido aise gowioro-ro. Ina nedi duriomoro gebari ro edi obo rido gosioihiro, keba urubia imese namabu sirio mutu nedi obo ro nou ro giarumo. Nedi keremasosowado urubia ro neio ro idaibo owera amadima-aro-ri, mabu Abera Naramu ro beda tanaro keba ia se na-gisioihiro, neio umoro sekere kaupoti neio ro nu huru gemowou-rimo, neio ubi tato ie nou kemaragoidiro.

⁷ Abora nedi tau ro nato nedi duriomoro gebari ro tobororo mutu, ibose beda mutu sogosogo namabu sirio ro iamo nato, Godi ro nedi atu owera ro neito irasogoro era ro iporeai ri. Kaupoti etio ra Godi huru na-emoworoho-dumo, neio womu tau sapuwo to irasogoro, neio ubauba kiwai sapuwo to era ro ama-ipisiamuti-ri.

⁸ Ina nedi owera ro nou se ba-demaragoidiro-mo, woki kemati modobo pua. Namuturubi nirimagare babio, 1,000 kisimisi, kaupoti saiki mutu neitiro Abera Naramu Godi aboudo atu sosoro ie.

⁹ Nou ro beda tanaro giwauti ororosioihiro ri, urubia ro nou sapuwo to aro-dumo ibo, Abera Naramu umodi ia ie nedi korowameai tanaro ro kosioihiro aboto. Sianu Abera Naramu umodi

dubu pua, nou ro beda oweru garo isioidiro ri. Kaupoti nou serawo nio aboto samo to oi-ri pua, imese urubia imotoititi-die ubauba aboudo erewesegere ri nou aboto. Mabu nu ubi tato ie ata dubu ata urio pamo kowea.

¹⁰ Kaupoti iedi tau ro namadi-orowateai-ri, urubia Abera Naramu ro piro se amadi-imuhia-ri, piro dubu beda sosoro kou ra, idaibo mino to amadi-ou-ri. Iedi tau ro nato obo kadoro diamo beda sosoro ra, toboro idaibo diamo mutu aise ama-araraseperai-ri. Saiki, sagana, kiboni, ibose duriomoro nu simara sogosogo namabu mutu, era ro aise ama-ipisiamuti-ri. Ata nakomu ata nedi sopu duriomoro gebari ro nato, masiro ararasoro-ri pua.

¹¹⁻¹² Morobise ie, imese namabu sirio, era ro ama-ipisiamuti-ri. Ina noudo ie nio ro nou sapuwo to na-imaragoidiro-dumo, ina nio beda mino to ama-orowomidiro-ri? Abera Naramu edi korowameai saiki ro nio namadime-emasebidiro-ri, nio tarena mino to ba-dirowomidiro, Godi ubi beda sosoro owamo. Nio ro idaibo tanaro namadimi-isioidiro-ri, nou edi korowameai tau ro nio ro aupise amadime-emowaititi-ri. Iedi saiki ro nato toboro nou simara sogosogo mutu era ro nato aise ama-ipisiamuti-ri. Saiki, sagana, kiboni neio aise ama-ihoriouti-ri, ata nakomu ata masiro ararasoro-ri pua.

¹³ Kaupoti Godi ro kebase oweru ta-garo ibo, orio toboro, orio duriomoro, nu ia ro ama-isioidiro-mari. Ina urubia iato nama-irowomidiro-ri, neio ro meamea tuputupu

tanaro se amadimi-isioidiro-ri. Iedi tanaro sirio ro kororosioiido aboto, nimo ro nou nimasebidiro-dumo.

Marea tato gi-orowomidiro-ri, ina keremowotoi modobo ie

¹⁴ Namuturubi nirimagare babio, nedi tanaro ro kororosioiido aboto nio ro nou emasebidiro-dumo. Ina noudo ie pupuwo auna ia se ba-diasibawado-mo duriomoro ato marea tato, ubauba tato korowomidiro aboto, ibose sirio tau nio Godi sosoro gabo ato miro to korowomidiro modobo ie.

¹⁵ Ina abora nedi oweru ro ma-demaragoidiro-mo ibo, nimo Abera Naramu samo to orowameai pua, mabu nou serawo samo to koi tato dubu e, urubia nou ro timaragoidiro-die. Nou auna ubi ie imese urubia nou ro kiapopo. Ina atu sosoro oweru nimo ata neama aboudo ie Pauro, nou edi muro kimaragoidiro ro Godi ro na-gomia-ro peba titi neito gisioiido, ina nio aboto nato gimeiriai-ro.

¹⁶ Nou ro sirio peba titi oweru erere urubia aboto na-isioidirotiti, nou sapuwo to atu sosoro oweru ta-gisioiido. Arua oweru nou ro na-imeiriotiti maumo imese koko ia ie. Nedi oweru maumo ro umoro tato urubia ro ibose pupuwo tato kimibiria urubia ro, morobise maumo neio ro karasaubuti mino to imabutiti-dumo. Neio ro ibose arua maumo oweru Tarena Buka ato na-iamo karasaubuti mino to imabutiti-dumo. Neio ro idaibo tanaro na-isioidirotiti-dumo, Godi aboudo imese moro to amadima-aragareawado-ri.

¹⁷ Kaupoti, namuturubi nirimagare babio oweru nio aboto ibo ie. Abora mo edi oweru ro

karasaubuti kitamudiro sapuwo to, nio ro umoro ta-goi-dumo. Nio nakara se keremowotoi modobo ie, ina noudo ie Godi edi morobise gabo ro neido ubauba tanaro kisioidiro urubia ro neio edi karasaubuti kitamudiro oweru ro neito nio neio ro iaubo-ri pua.

¹⁸ Kaupoti namuturubi, mo ubi ie nimo kiapopo dubu Abera Naramu Iesu Keriso, nou edi wisa tato nirimagare maumo ro nio nato kiroromai, ibose nou edi umoro maumo ro nato kiroromai.

Abora imese urubia ro Iesu memowabu-mo, imese imese tau. Ibose ba-mororosioidiro-mo!

Tareka Buka
Portions of the Holy Bible in the Bamu language of
Western Province, Papua New Guinea
Buk Baibel long tokples Bamu long Niugini

copyright © 2023 SIL Papua New Guinea

Language: Bamu

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2026-08-26

PDF generated using Haiola and XeLaTeX on 26 Aug 2026 from source files dated 26 Aug 2026

14d82267-f09c-5d69-a15a-8b9a709122b4